

金圣叹《不亦快哉三十三则》

其一：

夏七月，赤日停天，亦无风，亦无云；前后庭赫然如洪炉，无一鸟敢来飞。汗出遍身，纵横成渠。置饭於前，不可得吃。呼簟欲卧地上，则地湿如膏，苍蝇又来缘颈附鼻，驱之不去。正莫可如何，忽然大黑车轴，疾澍澎湃之声，如数百万金鼓。檐溜浩於瀑布。身汗顿收，地燥如扫，苍蝇尽去，饭便得吃，不亦快哉！

其二：

十年别友，抵暮忽至。开门一揖毕，不及问其船来陆来，并不及命其坐床坐榻，便自疾趋入内，卑辞叩内子：「君岂有斗酒如东坡妇乎？」内子欣然拔金簪相付，计之可作三日供也，不亦快哉！

其三：

空斋独坐，正思夜来床头鼠耗可恼，不知其戛戛者是损我何器，嗤嗤者是裂我何书。中心回惑，其理莫措，忽见一猓猫，注目摇尾，似有所矚。斂声屏息，少复待之，则疾趋如风，唧然一声。而此物竟去矣，不亦快哉！

其四：

於书斋前，拔去垂丝海棠紫荆等树，多种芭蕉二十本，不亦快哉！

其五：

春夜与诸豪士快饮，至半醉，住本难住，进则难进。旁一解意童子，忽送大纸炮可十余枚，便自起身出席，取火放之。硫磺之香，自鼻入脑，通身怡然，不亦快哉！

其六：

街行见两措大执争一理，既皆目裂颈赤，如不戴天，而又高拱手，低曲腰，满口仍用者也之乎等字。其语刺刺，势将连年不休。忽有壮夫掉臂行来，振威从中一喝而

解，不亦快哉！

其七：

子弟背诵书烂熟，如瓶中泻水，不亦快哉！

其八：

饭后无事，入市闲行，见有小物，戏复买之，买亦已成矣，所差者甚少，而市儿苦争，必不相饶。便掏袖下一件，其轻重与前直相上下者，掷而与之。市儿忽改笑容，拱手连称不敢，不亦快哉！

其九：

饭后无事，翻倒敝筐。则见新旧逋欠文契不下数十百通，其人或存或亡，总之无有还理。背人取火拉杂烧净，仰看高天，萧然无云，不亦快哉！

其十：

夏月科头赤足，自持凉繖遮日，看壮夫唱吴歌，踏桔槔。水一时湔涌而上，譬如翻银滚雪，不亦快哉！

其十一：

朝眠初觉，似闻家人叹息之声，言某人夜来已死。急呼而讯之，正是一城中第一绝有心计人，不亦快哉！

其十二：

夏月早起，看人於松棚下，锯大竹作箬用，不亦快哉！

其十三：

重阴匝月，如醉如病，朝眠不起。忽闻众鸟毕作弄晴之声，急引手褰帷，推窗视之，日光晶荧，林木如洗，不亦快哉！

其十四：

夜来似闻某人素心，明日试往看之。入其门，窥其闺，见所谓某人，方据案面南看一文书。顾客入来，默然一揖，便拉袖命坐曰：「君既来，可亦试看此书。」相与欢笑，日影尽去。既已自饥；徐问客曰：「君亦饥耶？」不亦快哉！

其十五：

本不欲造屋，偶得闲钱，试造一屋。自此日为始，需木，需石，需瓦，需砖，需灰，需钉，无晨无夕，不来聒於两耳。乃至罗雀掘鼠，无非为屋校计，而又都不得屋住，既已安之如命矣。忽然一日屋竟落成，刷墙扫地；糊窗挂画。一切匠作出门毕去，同人乃来分榻列坐，不亦快哉！

其十六：

冬夜饮酒，转复寒甚，推窗试看，雪大如手，已积三四寸矣，不亦快哉！

其十七：

夏日於朱红盘中，自拔快刀，切绿沉西瓜，不亦快哉！

其十八：

久欲为比丘，苦不得公然吃肉。若许为比丘，又得公然吃肉，则夏月以热汤快刀，净割头发，不亦快哉！

其十九：

篋中无意忽检得故人手迹，不亦快哉！

其二十：

存得三四癩疮於私处，时呼热汤关门澡之，不亦快哉！

其廿一：

寒士来借银，谓不可启齿，於是唯唯亦说他事。我窥其苦意，拉向无人处，问所需多少。急趋入内，如数给与，然而问其必当速归料理是事耶，为尚得少留共饮酒耶，不亦快哉！

其廿二：

坐小船，遇利风，苦不得张帆，一快其心。忽逢扁舸，疾行如风。试伸挽钩，聊复挽之。不意挽之便著，因取缆纜向其尾，口中高吟老杜「青惜峰峦，共知橘柚」之句，极大笑乐，不亦快哉！

其廿三：

久欲觅别居与友人共住，而苦无善地。忽一人传来云有屋不多，可十余间，而门临大河，嘉树葱然。便与此人共吃饭毕，试走看之，都未知屋如何。入门先见空地一片，大可六七亩许，异日瓜菜不足复虑，不亦快哉！

其廿四：

久客得归，望见郭门，两岸童妇，皆作故乡之声，不亦快哉！

其廿五：

佳磁既损，必无完理。反覆多看，徒乱人意。因宣付厨人作杂器充用，永不更令到眼，不亦快哉！

其廿六：

身非圣人，安能无过。夜来不觉私作一事，早起怍怍，实不自安。忽然想到佛家有布萨之法，不自覆藏，便成忏悔，因明对生熟众客，快然自陈其失，不亦快哉！

其廿七：

看人作擘窠大书，不亦快哉！

其廿八：

推纸窗放蜂出去，不亦快哉！

其廿九：

作县官，每日打鼓退堂时，不亦快哉！

其三十：

看人风筝断，不亦快哉！

其卅一：

看野烧，不亦快哉！

其卅二：

还债毕，不亦快哉！

其州三：

读虬髯客传，不亦快哉！